

清

史

清史

清史

目次

- 第一章 清初起兵
- 第二章 滿洲建國
- 第三章 太宗用兵
- 第四章 明室滅亡
- 第五章 清朝定鼎北京
- 第六章 弘光隆武永曆三帝之擁立
- 第七章 紹興監國
- 第八章 鄭芝龍叛明

目次

目次

第九章 鄭成功起義

第十章 議政大臣專橫

第十一章 三藩起事

第十二章 康熙之隆運

第十三章 尼布楚條約

第十四章 世宗之治術

第十五章 準噶爾之兵事

第十六章 西藏之平定

第十七章 回部之平定

第十八章 金川之平定

第十九章 苗疆改流

第二十一章 暹羅賓服

第二十二章 安南賓服

第二十三章 臺灣剿定

第二十四章 乾隆極盛

第二十五章 白蓮教匪之亂

第二十六章 嘉慶之治亂

第二十七章 平糴

第二十八章 阿片戰爭

第二十九章 道光之治亂

第三十章 英法聯軍入北京

目次

第三十一章 太平國軍起事

第三十二章 太平國滅亡

第三十三章 捻兵擾亂

第三十四章 俄國南侵

第三十五章 咸豐革政

第三十六章 日本結約

第三十七章 東西兩太后之垂簾

第三十八章 失外藩

第三十九章 法越兵事

第四十章 日本干涉朝鮮

第四十一章 甲午戰爭

第四十二章 列國干涉

第四十三章 戊戌政變

第四十四章 義和團匪之亂及聯軍入京

第四十五章 日俄衝突及清廷中立

第四十六章 西太后專政

第四十七章 宣統帝嗣立

第四十八章 革命軍緣起及中華民國之成立

第四十九章 清室滅亡

第五十章 結論

清史

緒論

歷史學之要義。在使讀者明於民族之進化。社會之變遷。邦國之興衰。而政體沿革。與夫國家建設之根本。尤有關係焉。故論全史系統。則推本於人類遞衍。文化由來。而以近世史爲歸宿。若論近世史系統。則一代之興衰。上與歷朝互爲因果。足以證民族社會之現狀。而遂爲現世之導源。清史者。全史中之近世史。其因果首尾。均足爲現世之研究資料者也。革命功成。專制告畢。彼滿清帝室。以二百六十八年之鋪張事業。結數千年專制君主之局。無論其種族風俗政體。在在供人注意。卽此大變革之改良進化。已非尋常之近世史可比。今日者。退位事定。民國政府成立。旣使前清一代之事實。因果昭彰。首尾完具。歷史家苟欲求吾國之陳迹。爲視察時勢。針砭

習慣之預備。其重要知識。孰有過於是者。試取滿洲創業之始。與迄於宣統之亡。統覽而熟審之。當憬然於民族社會之競爭。國家政體之改進。專制之物極必反。共和之鬱極斯通。公例昭然。不可誣也。茲舉其始終。略分三大時期。比於提綱挈領之說。

(一) 興盛時期 自愛親覺羅氏發達之初。以逮關外兼併。入主中原。將漢族數千年來之神器大寶。取而代之。而又征服以威力。收拾以心術。一變尊王攘夷之古義。爲異族君臨。滿漢混合之政俗。殲明孽。掃三藩。收臺灣。席捲蒙藏。準回。誇耀武功。一時已達極點。而後刑賞懲勸。假手文治。以顛倒一世之人心。於是而康雍乾三朝之全盛。爲滿人大得意之秋。

(二) 衰弱時期 乾隆極盛之餘。驕奢淫佚。和珅爲之傀儡。元氣大傷。供求始不相應。民間不平之甚。一動而不可遏。則自嘉慶之初。以逮咸同光緒之末。內憂外患。迄無寧歲。皆此一原因如貫串之相承而下也。敎徒苗族之不已。而太平天國之革

命軍蔓延十六省。滿清之危亡。不絕如綫。海寇割藩之不已。外兵侵入。開市場。占軍港。以及鑛山鐵路。攫取利權。其勢如洪水滔天。不可或禦。於是滿人之豪氣已盡。抑且專制之命運。亦如日薄崦嵫。長繩難繫矣。時會之變遷。豈偶然哉。

(三)改革時期 光緒叔季。迭受外患戟刺。始幡然有變政之動機。然風潮起伏。曲綫多歧。立憲名號。徒爲欺人之語。新政籌備。轉供寵賂之資。於是國人疾首痛心。確知專制君主之決不足以有爲。而滿人爲尤甚。豈知清廷之敷衍愈工。國人之熱心改革愈厲。革命一呼。全局震動。不及四月。幼主退位。大改革告成矣。然優待皇室。五族平等。同享共和幸福。絕少亡國之慘痛。實爲歷史所無。又豈非改革之明效大驗哉。專制之末日。亦爭奪相殺之末日也。

第一章 清初起兵

位於長白山黑龍江間。有廣野焉。是曰滿洲。北則沿海兼連西伯利亞。南部隔遼東半島。接十八省本部。而所謂愛親覺羅氏者。實由此間一小部落。崛興以統一中國。白山黑水。大起風雲。方其盛時。龍旗飛揚。席捲四百餘州。一時無敵。及其衰也。革命軍起。四閱月而覆其宗社。何其起之暴。而衰亡之速也。今欲述其興亡之跡。請先溯古代之沿革。

東周時有肅慎國。在今吉林省中央。東西蕃殖。遂成通古斯族。至後漢三國時。稱挹婁。後稱靺鞨。分若干部落。各部皆戴酋長一人。而各部內最大者。爲黑水靺鞨。粟末靺鞨二部。粟末靺鞨據鴨綠江與大同江流域。乘高句麗國滅亡時。併其版圖。建設渤海國。勢力頗振。黑水靺鞨。初據黑龍江沿岸。卒亦臣服於粟末靺鞨。至唐中葉。通古斯族。有在遼河上流。建立強國者。是曰契丹。滅渤海國。侵略直隸山西各地。契丹雄主阿保機出。適在唐末五代之交。乘中國喪亂。助後晉高祖石敬瑭滅後唐。割取

幽燕之地。敬瑭子襲帝位。以不稱臣於契丹。阿保機率大軍入洛陽破滅之。稱帝中原。各地藩鎮不服。舉旗反。契丹主自知終不能用夷治華。徒蹂躪中原無益。決計北歸。病死於途。契丹建都今之北京。稱燕京。宋時改國號曰遼。實爲中國勁敵。遼時黑水靺鞨之一部曰熟女真。與渤海俱歸化於遼。惟黑水靺鞨之別部有曰生女真者。陽受羈縻。陰實敵國。怨遼之虐政。常欲恢復肅慎遺業。及遼主天祚時。生女真有傑出之完顏阿骨打者。叛遼起兵。侵掠各地。卒與宋同盟滅遼。建設金國。爲金太祖。未幾陷宋汴京。虜徽欽二帝。宋遂遷都臨安。金之國威遠出遼上。六傳至章宗。蒙古鐵木真出。占黑龍江上流之斡難河流域。稱帝。是爲太祖。蒙古在唐時。散居契丹西北。爲室韋一部。世臣屬於遼金。至元太祖鐵木真時。合併近隣各部落。破金。滅西夏。征服北方諸夷。至太宗滅金。世祖忽必烈滅宋。君臨夷夏。於是建五府。置軍民萬戶。以治女真諸部。自是歷九十年。明太祖起自江南。代元稱帝。元之遺衆。遁居蒙古。及成

祖之世。屢舉兵北伐。平元裔之謀叛者。其統治權遠及滿洲北部。遂分女眞爲海西、建州、野人三部。以各酋長任都督指揮鎮撫等官治之。建州之女眞。屢起叛亂。憲宗成化三年。命朝鮮來援。擒其叛酋李滿住。神宗萬曆初。任鐵嶺李成梁爲遼東總兵官。鎮遼東。時建州都督兀堂。海西都督王台。各據一方。迭相雄長。王台居海西衛南關之哈達。稱哈達萬汗。萬曆三年。王台以討建州都指揮王果之叛有功。拜龍虎將軍。時有赫圖阿拉（卽今興京）豪族。名覺昌安者。與其子塔克世共與此役。初圖倫城主尼堪外蘭。與明總兵官李成梁共圍王果之子阿台於古噶城。阿台之妻。卽覺昌安之孫女。故覺父子以計入城救之。尼堪外蘭給城兵使殺阿台出降。已而兵士屠其城。並殺害覺昌安及其子塔克世。塔克世係女眞後裔。亦通古斯族也。世居寧古塔西南之鄂多羅。明英宗時。覺昌安之祖孟特穆。移居於赫圖阿拉。及覺父子俱爲尼堪外蘭慘殺。塔有遺子曰努爾哈赤。（卽清太祖）年甫十七。因避難潛居

赫圖阿拉附近者。凡九年。不忘祖父之仇。常欲待時而動。萬曆十一年五月。太祖乘夜襲尼堪外蘭破之。翌年。明人執尼堪外蘭以畀太祖。太祖殺之。以報讐。是爲清太祖創業之始。

第二章 滿洲建國

民國紀元前三百二十九年。卽明萬曆十一年。滿清太祖覺羅努爾哈赤滅尼堪外蘭。得鎧冑三十領。兵百人。卽用以克完顏部。四隣小部落。皆歸服之。至萬曆十五年。太祖娶海西北關葉赫部龍虎將軍那林孛羅之妹。得有力之外援。且得額亦都何和哩等五賢才。羽翼漸成。十七年。太祖受明建州都督職。以建州之滿住爲根據地。威振遠近。時出兵略取鴨綠江部。盡併其衆。又開貿易場於撫明、清河、寬甸、靉陽四關。其土產有人參、紫貂、猞猁、獾、玄狐等。始通互市。於是兵強食足。爲四境所忌。萬曆

二十一年。海西女真四部哈達、葉赫、輝發、烏拉。與蒙古科爾沁三部。長白山附近二部。都合九部。聯軍三萬。分三路來侵。欲遂一舉滅建州。國人見聯軍張營於渾河北岸。皆恟怖。太祖率諸貝勒（貝勒宗族階級之名）至堂子（神佛之祈禱所）祭天。整兵進軍。至古嘯山。迎擊聯軍。大破之。由是軍威益振。萬曆二十三年。明封太祖爲龍虎將軍。二十七年。伐哈達之龍虎將軍猛骨孛羅。殺之。遂併南關。三十五年。伐輝發。滅之。四十一年。伐烏拉。滅之。又科爾沁部之貝勒明安。以太祖已破九部聯軍。來請和。四十三年。科爾沁部貝勒孔果爾亦來通好。四十四年。太祖以平定各部。欲奠定領土。久治滿洲。乃奉蒙古喇嘛教。建佛寺於赫圖阿拉城之東。立祖廟。祭戰歿將士。又定軍隊制度。置紅白黃藍四旗。更加白綠於紅旗。餘三旗亦各施紅綠黃綠。稱爲鑲紅鑲白鑲黃鑲藍等四旗。合爲八旗。每兵三百人。設一佐領。每五佐領。設一參領。每五參領。設一都統。每都統置左右副都統。稱八旗八都統。軍務之外。以佐領

兼司版籍經營土田斷聽訟獄其餘文物制度亦漸備乃從諸貝勒及羣臣之請即大汗位稱建州國。是年爲天命元年。由是不奉明正朔。時太祖年五十八。

萬曆四十六年。太祖與明開釁。舉七大恨告天曰。明邊吏輕用尼堪外蘭之謀。無故起釁。致我二祖被害。恨一也。明不守界約。衛助葉赫。縱兵侵掠。恨二也。明邊民每歲踰境行竊。依約當誅。及遣使臣申明理由。明反以背約爲詞。殺使臣十人於邊境。恨三也。明助葉赫致已聘之女。改嫁蒙古。恨四也。明遣兵驅逐柴河三岔撫安三路人民。耕田藝牧。不容刈穫。恨五也。信葉赫之言。遣書責我。肆行詬辱。恨六也。天授哈達。幸被征服。明又脅服其國。恨七也。因起軍寇明。降撫順。陷清河。時女真西部。獨葉赫不下。葉赫方與朝鮮王光海君連合。求救於明。神宗聞報。詔遼東經略使楊鎬大舉征滿洲。且使葉赫朝鮮二兵由南北兩路來會。清太祖乃率八旗兵。乘明軍未至。邀擊總兵杜松於撫順東七里之薩爾滸山。大捷。乘機突擊各路明軍及援軍。銳不可

當明軍盡棄兵器及輜重敗走。是謂薩爾滸山之役。後太祖又出軍陷開原城。進攻降葉赫之北關。自此屢擾遼河流域。抄掠附近。明熹宗天啟元年。太祖又率八旗精銳。攻瀋陽城。取之。長驅陷遼陽。先是太祖欲擇形勝地建都。定帝業。既得瀋陽。觀察地勢。大喜。遂於是年定都其地。

第三章 太宗用兵

金太祖阿骨打自起兵滿洲。至破遼。入山海關。僅經九年。陷北京。而清太祖努爾哈赤則經四十年。猶未入山海關。豈其戰略與兵力。較前金爲劣歟。非也。唯遼與明之勢迥殊。故難易互見。遼自南侵以後。歷百六十年之久。與文弱之宋爲鄰。君臣習於苟安。上下恬嬉。武備廢弛。契丹舊日慄悍之風。悉爲驕奢游惰之俗所同化。故侵遼。百戰百勝。如入無人之境。墟其宗社。易如反掌。宜也。至明則反是。明之季世。國勢雖